

Uunga siunnersuut: Inuit innarluutillit tapersersorneqarnissaannut Inatsisartut inatsisaat

(Peqqissutsimut Inunnullu Innarluutilinnut Naalakkersuisoq)

Saqqummiussissut

(Peqqissutsimut Inunnullu Innarluutilinnut Naalakkersuisoq)

Siullermeerneqarnera

Inuit innarluutillit tapersersorneqarnissaannut Inatsisartut inatsisissaattut siunnersuut Naalakkersuisut matumuuna saqqummiuppaat.

Inuit innarluutillit assigiinngitsunik tunuliaqutaqarput, kissaateqarput pisariaqartitsillutillu. Ataqqinassuseqartumilli isumalimmillu inuuneqarnissamut inuiaqatigiinnilu naligiimmik inissisimanissamut pisinnaatitaaffeqartitaanissartik assigiissutigaat.

Taamaammat inuiaqatigiittut inuit ataasiakkaat periarfissaannut killiliisartunik akimmiffiaasariaqarpugut. Inatsisissatut siunnersuut una ilorraap tungaanut pingaarutilimmik alloriaqqinnissatsinnut tunngaviliivoq. Pisinnaatitaaffinnut tunngasuni pitsanngorsaavugut, tapersersuinnermut tunngasuni eqaallisaavugut inuillu ataasiakkaat pisariaqartitaannut periarfissaannullu tunngasut malunnartumik ukkatarineruavut.

Politikkikkut sammivissap susassaartuni qitiusumik inissisimasuniinnaanngitsunit ilusilersorneqarnissaa, Naalakkersuisut aamma pingaartippaat. Taamaammat nunatsinni borgmesterit aamma Tilioq kiisalu NIIK inunnullu innarluutilinnut tunngasuni suliassaqaarfik pillugu politikikkut siunertat anguniakkallu pillugit inatsisissatut siunnersuutip suliarinerata aallartisarnanili oqaloqatiseraavut. Taakku isumaasa misilittagaasalu matumani inatsisissatut siunnersuutip inaarnissaannut tusarnissaat pingaaruteqarsimavoq.

Tamanna Naalakkersuisut tunngaviusumik qanoq suleriuseqarnerannik ersersitsisuuvoq: Inuit innarluutillit pillugit suliassaqaarfik atajuartussamik pitsanngorsaasinnaajumalluni kommunit, peqatigiiffiit kattuffiillu inuillu suliassaqaarfimmut tassunga inuillu innarluutillit ulluinnarni inuunerannut attuumassutilinnik ilisimaarinnittut oqaloqatigisarnissaat pisariaqarpoq.

Taamaammat inatsisissatut siunnersuut erseqqissunik pitsanngorsaannertaqaaluppoq.

Inuusuttut innarluutillit inersimasutut inuunermut ikaarsaarnerminni nammineersinnaaneruleriartornerminnilu toqqissisimanerunissaannut malitseqartinneqarnissamik periarfissaqalissapput. Inunnullu ataasiakkaanut ilaqaatasunullu pitsaanerpaasorineqarpat, qanigisaasut ilaquttaminnik innarluutilimmik paaqqutarinninnissamut periarfissaqalissapput. Taamatuttaaq inuit innarluutillit ilaquttaminnut, attavigisartakkaminnut nunaqqatiminnullu attaveqaannarsinnaasut amerlaneroqqullugit, angerlarsimaffiinnut qaninnerusunik ulloq unnuarlu neqeroorutini najugaqarnissaannut periarfissanik aamma pitsanngorsaavugut.

Pingaarutilinnik pitsannguinaartaqarpoq. Naalakkersuisut inuit innarluutillit pillugit politikki ikiuinnermut isumassuinnermullu taamaallaat tunngatinngilaat. Tassami pisinnaatitaaffinnut, nammineq aalajangiisinnaanermut, peqataatinneqarnissamut namminiussuseqarsinnaanissamullu aamma tunngatippaat.

Tassa inatsisiliorneq immiini naammangilaq.

Suliatigut ilisimasalinnik piukkunnartunik sulisussaaleqineq ajornartorsiutitta annersaannut ilaavoq. Taamaammat sullisseriaatsip pitsanngorsarnissaanut digitalimik ingerlanneqartalernissaanut aningaasanik inatsisissatut siunnersuuteqarnikkut immikkoortitsivugut. Tamanna suliatigut ilisimasaqarnerulersitsissaaq, pitsaanerusumik sullisseriaaseqalersitsissaaq inuillu innarluutillit pillugit suliassa qarfik pillugu tutsuiginarnerusunik paasissutissaqarnerulersitsillunilu ilisimasaqarnerulersitsissaaq.

Piukkunnartunuttaaq pisariaqartinneqartunut orniginarsaanermut sulisooreersunillu attassiniarnermut pikkorinnerulertariaqarpugut. Tamannami pisinnaatitaaffiit Inatsisartuni akuerisatta inuit ulluinnarni inuuneranni aamma malugusuutigineqarsinnaanissaannut pingaaruteqarpoq.

Inatsisissatut siunnersuutip aningaasaqarnikkut kingunerisinnaasaanut tunngasortaa ernumassutigineqartoq tusarniaassutigineqarnerani paasinarsivoq. Naalakkersuisut tamanna ilumooruppaat. Paasissutissat maanna pigisavut aningaasaqarnikkut kingunerisinnaasaata missingersoqqissaarnissaannut naammangillat, taamaammallu tamatumunnga tunngasuni pisut malinnaaffigineqaaqqissaassapput.

Paasissutissaalatsinerpulli pissutsinik pitsanngorsaanissatsinnut killiliisuusariaqanngilaq.

Suliassa qarfimmi tassani suliatigut pitsanngorsaanissamut ilisimasanik isumalluutinillu pisarialinnik pissarsiutugaluta pisinnaatitaaffiit pitsanngorsarnissaannut sapiissuseqartariaqarpugut. Taamaammat inatsisissatut siunnersuutip atuutilernerata aningaasaqarnikkullu kingunerisinnaasai ukkatarineqarlutik atuutilerneraniit ukiut marluk qaangiutsinnagit nalilersorneqarumaarpoq.

Inuit innarluutillit pillugit politikkerput pingaarutilimmik tunngaveqarpoq: Inuit innarluutillit ataasiakkaat innarluuteqarnerat kisimi periarfissanik killiliisuuneq ajorpoq. Tassa akimmiffiit inuiaqatigiittut nammineq pilersissimasavut namminerluunniit anigorniarsimanngisavut killiliisuusarput. Naalagaaffiit Peqatigiit inuit innarluutillit pillugit isumaqatigiissutaata tamatumunnga aamma tunngaveqarnera inuiaqatigiittut inunnik innarluutilinnik peqataatitsinissatsinnut, namminiussuseqarnissatsinnut inuiaqatigiinnilu naligiimmik inissisimanissatsinnut pisussaaffiliivoq.

Inatsisissatut siunnersuut una anguniagaqarnermiit timitaliinermut alloriarnissatsinnut tunngaviliisuussaaq. Pisinnaatitaaffinnut tunngasuni pitsanngorsaavugut, ilaqutariinnut periarfissanik pitsaanerusunik pilersitsivugut inuillu innarluutillit pillugit suliassa qarfimmi ataqatigiissaarnerusumik suliniuteqarnissamut patajaannerusumik tunngavissiilluta.

Suli unamminartoqartuaannartussaassaaq aaqqiivigisassatsinnik. Siunnerfippulli ersarippoq: Inuit innarluutillit nammineq inuunererusutaminnik inuunissamut pitsaanerusunik periarfissaqarlutik pisinnaatitaaffeqassapput, ataqqinassuseqartumik, namminiussuseqarlutik naligiimmillu pineqarlutik.

Naalakkersuisut sinnerlugit siunnersuut Inatsisartunut matumuuna suliassanngortippara.